

輯溫病條辨論

清 恒齋 撰

民國二十五年序刊本

序

汪瑟菴相國所訂溫病條辨一書。乃皖江吳鞠通先生手著。專爲溫病說法。各省無刊版。僅爲浙西葉氏家藏。偶於拜竹山房。王君案頭閱之。如獲至寶。蓋其法得之姑蘇葉氏。而能集其大成者也。證按四時。治分三焦。條分縷析。迴與傷寒治法有別。第四雜說一卷。其中鉤元提要。非深達夫陰陽之理。深通乎六氣之微。不能道其隻字。而幼科之痧病。與婦科之胎產。猶爲獨開生面。發前人之所未備。爰重刊以公諸世。尙望好善諸君。廣印流傳。俾使業醫者熟讀深思。胸有成竹。臨證時審定寒熱虛實。庶不至有毫釐千里之謬云。

嶺南恆齋氏謹識

按本書採集「輯溫病條辨論」及「溫病醫方撮要」之溫病十五方。皆恆齋先生輯刊溫病條辨之末。爲辨溫治溫之精論驗方。爰爲採補。以供同人參攷。得增廣識見。不無裨益云。

民國二十五年一月

鄞縣曹炳章誌

韓溫病條辨論

恆齋序

二

輯溫病條辨論

嶺南 恆齋先生撰述

鄞縣 曹炳章氏訂正

前三卷溫病條辨。乃天地四時錯行之常氣。常氣者。風寒暑溼燥火。此論乃天地之雜氣。雜氣者。疠癘旱潦烟瘴之毒氣。俗所謂溫疫病是也。多起於兵荒饑饉之年。樂歲亦有之。春夏之交為甚。有觸之者。各隨其氣而為諸病焉。傷寒病自氣分傳入血分。溫病由血分發出氣分。雖有表症。實無表邪。斷不可發汗。況溫病無陰證一語。尤為透宗。故仲景有刺五十九穴之旨。示人不以傷寒之法治溫病。明甚。讀傷寒論平脈篇曰。寸口脈陰陽俱緊者。法當清邪中於上焦。濁邪中於下焦。清邪中上。名曰潔也。濁邪中下。名曰渾也。陰中於邪。必內慄也。按此四十六字。全非傷寒脈症所有事。乃論溫病所從入之門。所謂赤文綠字。開天闢地之寶符。大意謂人之真氣通於天。如毒霧烟瘴。謂之清邪。從鼻息而上入於陽。而陽分受傷。感之

發熱頭腫。項強頸攣。俗稱大頭溫。蝦蟆溫。是也。人之口氣通於地。如水土物產。化爲濁邪。從口舌而下入於陰。而陰受傷。久則臍築揪痛。嘔瀉腹鳴。足膝厥逆。便清下重。俗稱絞腸溫。軟脚溫。是也。然從口從鼻所入之邪。必先住中焦。分佈上下。故中焦受邪。則清濁相干。氣滯血凝。釀變卽現中焦。與俗稱瓜瓢溫。疔瘡溫。是也。此三焦之邪。治法急以逐穢爲第一義。非瀉則清。非清則瀉。其脈不浮不沉。中按洪長滑數。右手反盛於左。若左手脈盛。或浮而緊。自是感冒風寒。非溫病也。始病不惡寒而發熱。一熱卽口燥咽乾而渴。又有身大熱而四肢不熱者。此名厥證。雜氣怫鬱。火邪閉脈。而伏。陽氣不能交接於四肢。甚至六脈俱絕。此脈厥也。通身冰冷。此體厥也。卽仲景所謂陽厥。厥深熱亦深。下之斷不可遲。若以四逆湯溫之。則壞事矣。伏讀緒論之邪氣充斥。奔迫六字。不但爲傷寒合病併病傳神。並可爲溫病傳神。溫病有陰陽二毒。傷寒論曰。陽毒爲病。面赤斑斑如錦紋。咽喉痛。陰毒爲病。面目青。身痛如被杖。咽喉痛。兩證五日可治。七日不可治。俱以升麻鱉甲湯主之。凡傷寒多從脈。溫病多從證。辟如溫氣充心。心經透

出邪火。橫行嫁禍。現出無窮怪狀。只瀉心經邪火。而餘邪自退。每見人有腎元素虛。或適逢淫慾。一值溫病暴發。邪限下焦。氣道不施。以致便閉腹脹。至夜發熱。一投升降雙解散。而小便如注。又人有宿疾。一着溫病。舊病復發。治法當先主溫病。溫邪退而舊病不治自愈。又若春秋俱行夏令。天地暴烈。人感受之。內外大熱。舌胎口裂。腹脅脹滿。頭痛身痛。狀類傷寒。而實非傷寒。狀類溫病。而實非溫病。此卽六淫之氣。當以溫病十五方。視其輕重而施之。蓋能滌天地疵癘之氣。卽能化四時不正之氣。又有一切無名暴病。頃刻卽亡。無識鄉愚。認爲鬼祟。並皆雜氣所感。是在臨證體會。總以十五方。及地龍湯。神明變化。未有不全者。

恆齋集

溫病大頭上六證辨

按大頭六證。乃溫病中之最重且凶者。天行疵癘之雜氣。人感受之。壅遏上焦。直犯清道。發之爲大頭溫也。其頭顛腦後項下。及耳後赤腫者。此邪毒發越於太陽也。其鼻額兩目。並額上面部。焮赤而腫者。此邪毒發越於

陽明也。其耳上下前後。並頭角赤腫者。此邪毒發越於少陽也。如喉痺項腫。頸筋脹大。俗名蝦蟆溫。正經所云。清邪中上焦也。如絞腸溫。吐瀉揪痛。軟脚溫。骨痿足重。正經所云。濁邪中下焦也。如瓜瓢溫。胸高吐血。疙瘡溫。紅腫發塊。正經所云。陰中於邪也。六證統以升降散主之。甚者增損雙解散。加味涼膈散。腮頰偏腫。咽喉腫痛。痰涎壅塞。滴水不能下者。用烏齒莧二斤。不見水。搗入白麵半斤。陳醋一兩。和勻敷腫處。口含升降散。即能下咽。半日間腫消盡如失。再酌服升降等散。以清餘熱。惺溪補遺

發斑疹

發斑者。輕如蚊跡。重如錦紋。其致此之由。總因熱毒不解。或當汗不汗。則表邪不解。當下不下。則裏邪不解。當清不清。則火盛不解。陽證誤用溫補。則陽亢不解。必須察脈之浮沉。人之虛實。熱毒之輕重。而治之。斷不可執成氏不可汗。不可下之說。凡邪氣自外而入。深入不解。則又自內而出。表裏相乘。勢所必至。原非表虛證也。但使內外通達。則邪由表裏而解矣。即

如犀角地黄湯。乃治斑之要藥。人知此湯。但能涼血解毒。而不知此湯。尤善解表散血。若用之得宜。裏氣一清。必通身大汗。熱邪頓解。何爲不可汗耶。發斑大熱。狂躁引飲。又何爲不可下耶。凡斑出赤紅者。爲胃熱。紫紅者。爲熱甚。黑色者。爲胃爛也。鱗紅起發者。吉。最忌稠密成片。如熱甚。脈洪數。煩渴者。以白虎湯。合犀角地黄湯。加殭蠶。蟬蛻。青黛。如熱毒內蘊。煩心不得眠。錯語呻吟者。犀角大青湯。加殭蠶。蟬蛻。或增損三黃石膏湯。加青黛。犀角。熱躁便結者。具加酒大黃。如斑發已盡。外熱稍退。內實便秘。譫語者。以加味涼膈散微下也。至於陰證。亦時有發斑者。狀如蚊跡。多出胸背手足間。但稀少而淡紅。身雖熱而安靜。以其人氣素弱。或因慾事傷腎。當補不補。則陰凝不解。或誤服涼藥太過。以致變成陰證。寒伏於下。逼其無根失守之火。聚於胸中。熏灼肺胃。傳於皮膚。而發斑點。補陰益氣。煎加乾薑。附子。寒甚脈微。大建中湯。通脈四逆湯。則真陽回。陰火降。而證乃痊。此治本不治標也。溫病無陰證。若夫疹與斑等。乃溫病中之重證也。發於皮膚而爲疹。增損雙解散主之。加紫背浮萍五七錢。或重加石膏大黃芒硝。清

散得宜。未有不出者。如身出而頭面不出。此毒氣內歸。危候也。急以大蟾
蜆一圓。搗和新汲水。去渣痛飲之。自出。屢驗。若溫病有久而甚者。煩躁昏
沉。只用蟾蜍心三兩個。搗和水飲一二次。定心安神。而病去矣。勿以為微
而忽之。凡斑疹脈洪長滑數易治。脈沉伏弦微難治。黑如果實醫者死。不
可不知。